

廿二史考異

五代史一

廿二史攷異六十一

錢大昕學

目錄

唐太祖家人傳第二 按唐莊宗子繼潼繼嵩繼蟾繼
堯晉高祖叔父萬友萬誼等周太祖子侗信姪守愿
奉超遜世宗子誼誠等皆雜敍成文初非各自爲傳
而目錄一一列之殊非史例竊意歐史元目祇有家
人梁臣唐臣晉臣漢臣周臣欵節从事一行唐六臣
義見伶官宦者雜傳之名後之讀史者增注姓名於
目錄之下以便檢尋非歐史本文也

梁臣傳弟九 李唐賓附朱珍傳不當列入目錄

伶官傳第二十五 伶官賤者不足立傳歐公類敍其事爲一篇以爲後世鑒戒與它傳體例各別今獨取敬新磨景進史彥瓊郭從謙四人列於目錄必非歐公元本若依此例則周匝亦宜入目錄矣

雜傳第三十 朱瑾宜附注朱宣之下此作大字另起而又不書姓非也張歸霸之弟歸厚歸弁高行周之從兄行珪監本皆作大字而不書姓唯汲古閣本得

之

雜傳第三十七 皇甫暉宜附趙在禮傳

雜傳弟四十二 李琪傳附見其兄珽事監本目錄列
李珽於琪之前誤也汲古閣本分注於李琪之下當
從之

雜傳弟四十三 目錄有盧損一人而傳闕之

雜傳弟四十五 馬重績趙延義二人方技也故列於
雜傳之末歐史無列女傳惟王凝妻見馮道傳論賈
章女見安重榮傳

梁本紀一

其父誠以五經教授鄉里 按宋梁自稱舜司徒虎之
四十六代孫石氏自稱衛大夫碏之後劉氏自稱東

漢淮陽王暭之後皆當時詞臣傳會臆造故歐公削而不書

王鐸承制拜溫左金吾衛大將軍河中行營招討副使

按舊唐書僖宗紀承制拜華州刺史潼關防禦鎮國軍等使

天雄軍亂囚其節度使樂彥貞 按唐書方鎮表天祐元年賜魏博節度號天雄軍此彥貞被囚在文德元年其時未賜天雄軍號蓋史家追稱之

淮西牙將申叢執秦宗權折其足 按申叢執秦宗權事据唐書僖宗紀在文德元年十一月此繫於龍紀元

年者蓋因郭璠殺叢事而追敘之

曹州將郭紹賓殺其刺史郭饒來降 唐書昭宗紀
曹州將郭銖殺其刺史郭詞與此紀姓同而名異
戰於洹水擒克用子落落唐本紀亦云
其子落落 按唐太祖家
人傳克用八子無落落名

取其泌隨鄧三州 泌當作唐唐書昭宗紀是年七月
朱全忠陷唐州隋州八月陷鄧州卽其事也曾三異
據唐地理志證泌字之誤其說良是但未及引昭宗
紀耳曾氏校正祇有四條俱在第
卷惟元集本及汲古閣本有之

遣朱友謙殺允於京師曾三異校定曰案家人傳殺崔

允者朱友謀非友謙 友謀當作友諒此刊本之譌
也全忠殺崔允唐書昭宗紀在天祐元年正月與此
差一年

遣蔣元暉殺德王裕等九王於九曲池 九王謂德王
裕棣王禡虔王禱沂王禋遂王禕景王禩祁王祺雅
王名犯廟諱 瑞王祥也見通鑑 唐書昭宗紀失書沂雅二

王

梁本紀二

開平元年五月封子友文博王友珪郢王友璋福王友
貞均王友徽建王姪一本脫姓字 友諒衡王友能惠王友

壽邵王 按家人傳同日封者尚有賀王友雍一人
紀失之

二年三月封鴻臚卿李崧介國公 五代會要作李從
四月翰林學士承旨禮部侍郎張策爲刑部侍郎同中
書門下平章事 按唐六臣傳策由中書舍人翰林
學士遷工部侍郎奉旨蓋梁祖之父名誠誠承同音
故改翰林學士承旨爲奉旨也開平三年九月翰林
學士承旨杜曉本傳亦作奉旨與此正同後唐以後
仍復承旨之名校書家失於稽攷并梁本紀中奉旨
字亦改爲承誤矣傳稱工部而紀云禮部攷之薛史

本傳則策由工部侍郎轉禮部及拜相乃轉刑部也
唐宋六部之次吏戶禮在左兵刑工在右吏兵爲前
行戶刑爲中行禮工爲後行由工而轉禮自右轉左
也由禮而轉刑自後行轉中行也此當時敘遷之格
攷官制者不可不知

五月潞州行營都虞候康懷英及晉人戰於夾城
城梁人謂之夾寨以誠城同音避諱改稱也歐史作
夾城則據晉人之詞

六月忠武軍節度使劉知俊 按是年三月書匡國軍
節度使劉知俊此又書忠武軍者攷其年五月改匡

國軍爲忠武與許州節鎮兩易其名要之仍鎮同州
名異而實不異故知俊傳不云改忠武節度也

三年七月襄州軍亂殺其留後王班 刘玘傳稱山南

節度使

梁本紀三

貞明二年十月中書侍郎鄭珏同中書門下平章事

按本傳珏以中書舍人翰林學士奉旨拜中書侍郎
同中書門下平章事非山中書侍郎拜相也通鑑據
唐餘錄書禮部侍郎鄭珏爲中書侍郎平章事宜得
其實

六年四月河中節度使朱友謙襲同州殺其節度使程全暉叛附於晉 按朱友謙傳友謙遣其子令德襲同州逐節度使程全暉因求兼鎮則全暉未嘗被殺也舊五代史末帝紀亦云友謙襲陷同州節度使程全暉單騎奔京師可證此紀之誤

唐本紀一

盡忠與其子執宜 按唐書沙陀傳盡忠與朱邪執宜謀不云其子且自金山至盡忠凡四世彼傳但稱沙陀不系以朱邪則二人之非父子明矣兩史之互異如此

咸通十三年徙國昌雲州刺史大同軍防禦使國昌稱疾拒命國昌子克用尤善騎射爲雲州守捉使國昌已拒命自用乃殺人同軍防禦使據雲州自稱留後唐以太供卿盧簡方爲振武節度使會幽并兵討之簡方行至鳳州草潰由是沙陀侵掠代北爲邊患矣明年僖宗卽位以李鋒爲靈武節度使宣慰沙陀六州三部落使以招輯之拜克用大同軍防禦使按唐書沙陀傳克用以乾符三年殺文楚邊校其丐克用爲大同防禦留後不許發諸道兵進捕諸道不甚力而黃巢方引度江朝廷度未能制乃赦之以國昌

爲大同軍防禦使國昌不受命據五代史則國昌拒命在先克用據雲州在後據唐史則克用殺文楚在先國昌拒命在後且一云懿宗咸通之末一云僖宗乾符之年其互異如此攷舊唐書懿宗紀咸通十三年十二月以李國昌爲檢校右僕射雲州刺史大同軍防禦等使國昌稱病辭軍務是月李國昌小男克用殺雲中防禦使段文楚據雲州自稱防禦留後十四年三月以新除大同軍使盧簡方爲單于大都護振武節度使時李國昌據振武節度至嵐州而卒與五代史大略相同惟五代史以嵐州爲鳳州則轉寫

之謁耳薛史武皇紀新書沙陀傳以爲乾符三年僖宗紀又以爲五年蓋均失之通鑑于咸通十三年書國昌徙大同防禦稱疾不赴至克用殺文楚事則書於乾符五年亦未甚核也

克用得從者薛鐵山賀回鶻等隨電光羅尉氏門出

唐書沙陀傳克用與薛志勤等閉關升南譙門縋走營志勤與鐵山蓋卽一人

遣弟克修將兵萬人 沙陀傳作克勤按唐家人傳太祖諸弟無名克勤者

葬克用於雁門 五代會要太祖葬建極陵

以朱邪爲姓拔野古爲始祖 五代會要懿祖諱執宜
沙陀府都督拔野之六代孫

爲契苾何力所敗遂沒不見 今攷唐書沙陀傳高宗
朝卽有沙陀金山從薛仁貴討鐵勒金山子輔國輔
國子骨咄支卽盡忠之父也何云沒不見邪

唐本紀二

梁謝彥章軍於楊劉 李存進碑作陽留

同光元年閏月祖國昌祖妣秦氏皆謚曰文景 按五
代會要國昌追尊文皇帝而太祖之母曰文景皇后
秦氏蓋帝謚文而后謚文景也紀以爲皆謚文景者

失之

李存進碑亦稱獻文皇帝

二年二月羣臣上尊號曰昭文睿武光孝皇帝
會要是年四月上尊號曰昭文睿武至德光孝皇帝
多至德二字又以二月爲四月

四年四月皇帝崩注年四十三 按五代會要莊宗以
唐光啓元年十二月二十二日生於晉陽宮天祐二
十年四月卽位於魏州年三十九同光四年崩年四
十二光啓元年乙巳 同光四年丙戌此云四十三者轉寫之焉也吳
縝據此誤文謂莊宗以甲辰生乃疑破王行瑜獻捷
時不止十一歲則誤之甚矣克用破邢州孟方立飲

藥死在龍紀元年已酉其時莊宗恰五歲吳氏乃舉文
德元年戊申晉兵破奚忠信事以實之亦非也

唐本紀三

父霓爲雁門都尉 一本霓作電誤

五代會要
亦作霓

天成元年三月壬子 通鑑作壬戌依長歷此月丁巳
朔無壬子日壬戌乃月之六日也當以通鑑爲正下
三

條成
同

甲寅軍變 通鑑作甲子乃三月八日也

丁巳以其兵南 通鑑作丁卯

壬寅入汴州 通鑑作壬午

四月丁亥莊宗崩

丁亥下當有朔字

壬子魏王繼岌薨

繼岌死於非命似不當以薨書

八月平盧軍節度使霍彥威殺其登州刺史王公儼

按符習傳公儼擒平盧監軍楊希望殺之因自求爲
節度使明宗乃以房知溫鎮平盧拜公儼登州刺史
公儼不時承命知溫擒而殺之此云霍彥威殺之未

知孰是

薛史本紀亦作霍彥威

二年七月隨州刺史西方鄴取夔忠萬州
按鄴傳云
拜夔州刺史不云爲隨州刺史

長興四年八月戊申大赦 是日上尊號曰聖明神武

廣道法天文德恭孝皇帝見通鑑故有大赦歐史書赦而不書上尊號

其卽位時春秋已高明宗生於唐咸通八年丁亥以同光四年丙戌卽位恰六十歲矣

唐本紀四

愍皇帝 五代會要愍作閔

明宗第五子從厚也 按家人傳明宗四子從厚次居三五代會要帝號篇亦稱第三子而於諸王篇則云明宗第二子從璵第三子從榮第四子從璨第五子從益蓋其時以從珂爲長子又以姪從璨列於昆弟

之次則從厚當居第五而從益爲第六矣紀傳雖異
詞要之各有所據

應順元年正月回鶻可汗王仁美遣使者來 按四夷

附錄稱唐莊宗冊王仁美爲英義可汗紀在同光二年是歲

仁美卒其弟狄銀立同光四年狄銀卒阿咄欲立天
成二年權知國事王仁裕遣李阿山等來明帝遣使

者冊仁裕爲順化可汗

紀在三年

晉高祖時又冊爲奉化

可汗仁裕訖五代常來朝貢今本紀於是年書仁美
遣使者來又清泰二年書回鶻可汗王仁美使其都
督劉福海來晉本紀天福三年書回鶻可汗王仁美

使翟全福來四年書封回鶻可汗王仁美爲奉化可汗此四條仁美字似皆仁裕之譌

三月戊辰庚午衛州此下當書皇帝崩而不書乃歐公之疏徐氏注謂當於廢帝紀書弑此亦文過之詞論史例自宜兩見如不書帝崩亦當云從珂入京師廢帝爲鄂王庶幾首尾完備也

莊宗呼其小字曰阿三不徒與我同年按潞王與莊宗皆以乙巳歲生故云同年

清泰元年四月弑鄂王徐氏注失書愍帝之年按五代會要唐天祐十一年十一月二十八日生於晉陽

長興四年卽位年二十一應順元年

卽清泰元年遇弑年

二十二此可據以補徐注之闕矣狀會要之文亦有

抵牾攷天祐十一年

卽梁乾化四年歲在甲戌應順元年歲

在甲午首尾僅二十一年若以年二十二推之當生於天祐十年若果生於天祐十一年則年止二十有一二者必有一誤也

薛史年二十一

三年十一月皇帝崩注年五十三按五代會要帝以

唐光啓元年正月二十三日生應順元年卽位年五十清泰三年崩年五十二此云五十三者亦傳寫之誤也吳氏據此誤本謂潞王以甲辰生不可信

晉本紀一

天福二年五月追尊高祖環

五代會要環作景

曾祖柳

汲古閣本柳作彬

會要亦作柳

考紹雍廟號獻祖

紹雍卽梟捩鷄也後更製名耳獻

祖五代會要作憲祖

六月張從賓寇河陽殺皇子重乂寇河南殺皇子重信

按家人傳重義爲東都留守

卽河南

重信爲河陽三

城節度使則河陽所殺者當是重信河南所殺者乃

是重義也義又音相同實卽一人

三年八月馮道及左僕射劉昫爲契丹冊禮使按遼

史會同元年晉遣守司空馮道左散騎常侍韋勳來上皇太后尊號左僕射劉煦右諫議大夫盧重上皇帝尊號此紀所書者兩正使之名耳

四年正月旌表淡州民李自倫門閭 按一行傳稱淡州司功參軍李自倫則非編戶之民也

七年六月皇帝崩於保昌殿 保昌殿在鄆都

注年五十二 按五代會要晉高祖以唐景福元年

歲二月二十八日生清泰三年卽位年四十五天福

七年壬寅歲崩年五十一此云五十二者轉寫之譌

晉本紀二

高祖六子五皆早歿。攷家人傳及會要，高祖子凡七人，重英、重乂、重允、重信、重進、重果皆先歿。此紀云六子五皆早歿者誤也。

天福七年十一月葬聖文章武孝皇帝於顯陵。章武下脫明德二字。

開運三年十二月奉國都指揮使王清。本傳作奉國都虞侯。

漢本紀

天福十二年四月蕃漢兵馬都孔目官郭威。按周本紀不言爲孔目官史之嗣也。

秋閏七月 依史例當書閏月

天平軍節度使高行周爲鄆都行營都部署 按薛史

高祖紀是年七月以鄆都留守天雄軍節度使杜重威爲宋州節度使以宋州節度使高行周爲鄆都留守其時天平節度李守貞與河中節度白文珂亦互相更代初無行周移鎮天平之事蓋歐史誤也

周本紀一

隱帝卽位是歲三月河中李守貞永興趙思綰鳳翔王景崇相次反 按漢本紀惟守貞反在三月思綰則以四月景崇則以七月此紀總繫之三月非也李守

五
貞傳云守貞乃決計反而趙思綰先以京兆反遣人
以赭黃衣遺守貞守貞大喜又與漢本紀不同
詔鎮寧軍節度使李宏義 宋史作洪義蓋宋初避諱
改名也子因悟李業卽宏義之弟亦當名宏業史家
避諱省上一字耳

請立秦寧軍節度使贊爲嗣 秦寧當作武寧徐州軍
號也

周本紀二

本姓柴氏邢州龍岡人也 按周太祖家人傳聖穆皇
后柴氏邢州堯山人也與太祖同里遂以歸焉太祖亦堯

此紀稱龍岡與傳互異

後山談叢云歐陽五代史
周家人傳柴后邢州龍岡

人世宗紀爲堯山人後山所引與今本正相反恐是誤記

顯德元年七月樞密院直學士工部侍郎景範爲中書

侍郎同中書門下平章事

按宰相除罷例皆書範

獨不書罷免月日據通鑑二年八月範罷判三司尋

以父喪罷政事歐史偶失書耳

顯德四年四月追冊彭城郡夫人劉氏爲皇后

按世

宗追冊劉后本紀書之太祖追冊柴后則不書此義
例之未一者

六年六月封子宗訓爲梁王宗誼燕國公

按宗誼世

宗長子漢末爲劉銖所殺顯德四年追封越王凡追
封之王本紀例不書此必誤也以家人傳證之當爲
宗讓之譌宗讓卽熙讓恭帝之弟薛史本作宗讓

五代史二

廿二史攷異六十二

錢大昕學

梁家人傳

文惠皇后王氏其生三子長曰廣王全昱次曰朗王存
次太祖后少寡撫其三子備食蕭縣人劉崇家黃巢
起太祖與存俱亡爲盜從巢攻廣州存戰死 按太
祖紀云父誠生三子曰全昱存溫誠卒三子貧不能
爲生與其母傭食蕭縣人劉崇家黃巢起曹濮存溫
亡入賊中巢攻嶺南存戰死與此文已爲重出而此
傳敘朗王存事又云初與太祖俱從黃巢攻廣州存

戰歟何其詞之不憚煩也

太祖卽位立四廟追尊皇考爲文穆皇帝 按立四廟上父謚已見本紀此亦可省

元貞皇后張氏 末帝立追謚曰元貞皇太后 太字衍

末帝德妃張氏 貞明五年妃病甚帝遽冊爲德妃其

夕薨 按康王友孜傳妃薨於貞明元年此云五年

誤也汲古閣本無五字

次妃郭氏 度爲尼賜名誓正 誓當作晉卽辯字六

朝俗體所謂巧言爲辯也

太祖二兄曰全昱曰存 按太祖二兄之名一見於本紀再見於文惠后傳此則三見矣歐史本以簡勝今卽此篇論之其重複可省者正復不少也

其一養子曰友文 五代會要以友文爲第二子

開平元年五月乙酉封友文爲博王 諸王受封之月

日已具本紀而傳又書之是亦可省也唐太祖家人

傳同光三年十二月辛亥封存美等唐明宗家人傳
天福四年九月癸未封李從益周世宗家人傳顯德
六年六月癸未封宗訓等其月日皆可省

貞明二年全昱以疾薨 五代會要贈尚書令謚德靖

貞明四年友能以陳州兵反

紀在龍德元年

唐太祖家人傳

大將軍李存信等

軍字衍

同光二年四月己卯皇帝御文明殿遣使冊劉氏爲皇后
按本紀是年二月癸未立劉氏爲皇后與此傳
月日不同五代會要云四月十三日行皇后冊禮今
檢通鑑長歷是月己巳朔則己卯乃十一日亦非十
三日也

後嫁契丹突厥李贊華

突厥當作突厥李贊華卽突
厥之賜姓名也史或稱本名或稱賜名不當重出

太祖四弟曰克讓克脩克恭克寧皆不知其父母名號

按唐書宰相世系表國昌子克恭克儼克用克柔

四人克恭乃克用之兄而五代史以爲克用弟克柔

之名見於義兒傳而家人傳不及焉皆歐公之疏也

克讓克脩克寧三人疑非國昌之子唐書孟方立傳
克脩克用每父

弟

存義 目錄唐本紀伶官傳俱作存乂

唐明宗家人傳

和武憲皇后曹氏 曹后與廢帝俱焚死此謚乃晉天

福五年正月所上晉高祖所尚公主卽其女也故爲

追行冊謚歐史不載追謚事亦太疏矣

五代會要
憲作顯

魏氏初適平山民王氏生子十歲矣明宗爲騎將掠平山得其子母以歸此事又見廢帝紀此云十歲而

紀云十餘歲亦小異

從榮大宴元帥府諸將皆有頒給控鶴捧聖嚴衛使人馬一匹絹十四匹按五代會要應順元年三月改左右羽林四十指揮爲嚴衛左右軍龍武神武四十指揮爲捧聖左右軍此從榮爲元帥在明宗朝似不應有捧聖嚴衛之名

有姪四人曰從璨從璋從溫從敏五代會要以從璨

爲明宗第四子

從璋天福二年卒 舊史晉高祖紀贈太師

從溫歷安國忠武義武成德武寧五節度封兗王晉高祖立復爲忠武軍節度使 按舊史唐明宗紀長興元年六月以左武衛上將軍李從溫爲許州節度使二年九月移鎮河東四年正月爲鄆州節度使五月封兗王十一月爲定州節度使閔帝末帝二紀失載從溫事晉高祖紀天福二年奉寧軍節度使李從溫加食邑實封三年加兼侍中五年爲徐州節度使少帝紀天福七年加兼中書令八年爲許州節度使歐

史失書河東天平

卽鄆州

泰寧三鎮其鎮武寧乃在晉

高祖時其復鎮忠武則在出帝時歐史皆失之也又

按唐中葉以後諸道節度使帶平章事兼侍中中書

令並列銜於勅牒後側書使字故有使相之稱五代

因之在京樞密三司使及侍衛親軍都指揮使等加

相銜者亦使相也歐史於諸節度加相銜者往往略

而不書則使而非相矣五代會要每帝宰相若干人

使相若干人各書其姓名當時之重使相如此今據

舊史以補歐公之闕

徙河陽三城卒於官

按舊史從溫以開運三年卒贈

太師

從敏漢高祖時爲西京留守 按舊史漢高祖紀天祐十二年以從敏爲西京留守加同平章事少帝紀乾祐元年三月加兼侍中

周廣順元年卒贈中書令 予論歐史於使相不應略而不書或謂當時藩鎮之權已重不係乎相銜之有無果爾則如秦王從榮雍王重美之加平章事何以不刪乎生前之侍中中書令平章事尚可不書追贈之中書令又何足書乎此史例之當歸畫一者未可置而不論也

唐廢帝家人傳

應州渾元人也 漢元蓋卽渾源避唐明宗諱改爲元
字爾

清泰二年爲樞密使天雄軍節度使 按本紀清泰二
年五月宣徽南院使劉延皓爲樞密使七月劉延皓
罷蓋由樞密出爲天雄軍節度也此文樞密使之下
當有出爲二字

愍帝遣人殺重吉於宋州 五代會要清泰元年七月
追冊爲太尉立廟於宋州

晉家人傳

后初號永寧公主清泰二年封魏國長公主 按五代會要永寧公主天成三年四月封至長興四年正月改封魏國公主清泰二年三月進封晉國長公主此傳云清泰二年封魏國者誤也唐家人傳曹后生晉國公主卽敬瑭所尚者而此傳不見晉國之名亦疏漏

公主自太原入朝于春節 五代會要廢帝正月二十三日生以其日爲千春節

德光報曰可無憂管取一喫飯處 此語又見契丹附

錄

漢家人傳

太祖入京師以謂漢大臣必相推戴及見宰相馮道等道殊無意太祖不得已見道猶下拜道受太祖拜如平時此事又見馮道傳

周世宗家人傳

宣懿皇后符氏其祖秦王存審父魏王彥卿按存審傳失載封爵五代會要周顯德元年進封衛王符彥卿爲魏王史亦失書

朱珍傳

珍軍已入甕城而垂門發垂門卽懸門也宋人避聖

祖嫌名改爲垂字

葛從周傳

拜昭義軍節度使封陳留郡王食其俸於家。是時澤潞爲晉所有但假其名以寵從周俾食其俸耳。王景仁爲寧國軍節度使奉朝請袁建豐遙領鎮南軍節度使俾食其俸此兩鎮亦非梁所有皆遙領也。宋世節度使在家食俸蓋亦因於五代然攷諸唐史昭宗天復初孫德昭爲靜海軍節度使孫承誨邕州節度使董從實容州節度使竝同平章事此三使相遙領邊鎮皆不之任又朱全昱領嶺南西道節度使朱友

寧領邕州節度使朱友倫領容州節度使皆在唐末
卽唐盛時皇子除節度大使者亦皆不之鎮也五代
會要梁末帝使相三十二人從周居其一予嘗見從
周神道碑云檢校太師兼侍中此歐史所失書也

張存敬傳

讓郡人也 當云亳州人

取其瀛漠祁景四州

漠當作莫

符道昭傳

晉兵攻破夾城道昭戰死 按五代會要梁太祖朝使
相二十七人道昭居其一據薛史則唐昭宗時授秦

州節度使已加平章事矣歐史竟不書其所授之官文雖簡而非史法

寇彥卿傳

拜彥卿感化軍節度使 梁置感化軍於華州而移鎮國軍額於陝州寇彥卿康懷英之鎮感化皆在華州
張歸厚爲鎮國軍節度則治陝州也

康懷英傳

徙鎮永平卒於鎮 按薛史懷英爲感化節度使已加平章事

劉鄆傳

列傳
以長安爲永平軍拜鄆節度使 薛史末帝紀乾化四年以永平軍節度使檢校太傅同平章事劉鄆爲開封尹遙領鎮南軍節度使則鄆在永平時已爲使相矣

子遂凝遂雍事唐皆爲刺史 遂凝官隰州刺史見范延光傳又爲華州節度使見一行傳

鄆妾王氏有美色鄆卒後入明宗宮中是爲王淑妃明宗晚年淑妃用事鄆二子皆被恩寵 此事已見唐家人傳若依劉知幾點煩之例稍易其文云明宗晚年王淑妃用事鄆故妾也故鄆子皆被寵而其它盡

芟之則文省而意更顯矣

張歸霸傳

開平二年拜河陽節度使以疾卒 據會要歸霸於太祖末帝時皆爲使相則其卒當在乾化三年以後而鎮河陽時已加平章事也

楊師厚傳

潁州斤溝人也 唐宋地理志皆無斤溝縣胡三省云九域志潁州萬壽縣有斤溝鎮萬壽唐汝陰縣之百尺鎮也開寶六年置縣

王景仁傳

乾化元年正月庚寅日有食之 按司天攷是年正月丙戌朔日有食之五代會要梁開平五年正月丙戌朔日食卽乾化元年也以通鑑長歷推之正月朔合是丙戌此云庚寅而不書朔皆失之

是日景仁及晉人戰大敗於柏鄉 按梁本紀正月丁亥景仁及晉人戰於柏鄉敗績則非庚寅亦非日蝕之日攷五代會要月蝕篇云正月二日爲唐莊宗敗於柏鄉則紀書丁亥日爲是矣吳氏纂誤亦舉此二事而疑而未決故特攷正之

賀瓌傳

末帝時遷左龍虎統軍宣義軍節度使 按薛史貞明

三年除宣義軍節度使加檢校太傅同平章事

王檀傳

徙鎮天平 通鑑云兼中書令

安重誨傳

徒陷彥溫於死而不能去潞王之患李嚴一出而知祥
貳仁矩未至而董璋叛 楊彥溫孟知祥李仁矩不
書姓而書名前史無此例雖下文有之狀先後殊倒
置矣此篇乃歐公用意之作狀敘事之中雜以斷制
大似論體蓋學史記而失之

戶部尚書李鑳得吳謀者言徐知誥欲舉吳國以稱藩
願得安公一言以爲信鑳卽引謀者見重誨重誨大
喜以爲然乃以玉帶與謀者使遺知誥爲信其直千
緝初不以其事聞其後逾年知誥之間不至始奏貶
鑳行軍司馬此事又見李鑳傳鑳傳稱楊溥而此
云徐知誥知誥相溥專其國政故也

重誨過鳳翔節度使朱宏昭延之寢室使其妻子奉事
左右甚謹重誨酒酣爲宏昭言昨被讒構幾不自全
賴人主明聖得保家族因感歎泣下重誨去宏昭馳
騎上言重誨怨望此事又見宏昭傳

但恨不與國家除去潞王 按重誨死於長興二年閏五月而從珂之封潞王乃在四年五月重誨口中安得稱潞王乎此亦歐史之失檢也

周德威傳

其小字陽五 葛從周碑作揚五

符存審傳

拜忠正軍節度使侍衛馬步軍都指揮使 按後唐天成三年升壽州爲忠正軍州屬淮南不在唐疆域之內蓋遙領也藥彥稠以侍衛步軍都虞候領壽州節度使與此同

史建瑭傳

晉王東追黃巢於冤朐還過梁軍其城北梁王置酒上源驛獨敬思與薛鐵山賀回鶻等十餘人侍晉王醉留宿梁驛梁兵夜圍而攻之敬思登驛樓射殺梁兵十餘人會天大雨晉王得與從者俱去縋尉氏門以出此事已見唐本紀本傳祇敘敬思从事自可以一二語了之

元行欽傳

及莊宗之崩不能自決而反逃歿以求生子謂行欽之不負莊宗明矣其出奔也安知非志出於復讎歟

陽之論所謂責人斯無難也

符習傳

後徙鎮安國又徙平盧 按薛史同光元年加同平章事天成元年加兼侍中

孔謙傳

鄴北都也宜得重人鎮之非張憲不可崇韜以爲然因以憲留守北都 按唐本紀同光元年以魏州爲東京卽鄴也張憲傳亦云爲東都副留守此作北都誤

李嚴傳

知祥發怒曰天下藩鎮皆無監軍安得爾獨來此此乃

孺子熒惑朝廷爾卽擒斬之明宗不能詰也此語亦見後蜀世家

毛璋傳

璋累歷藩鎮按薛史天成元年邠州節度使毛璋加同平章事亦使相也

朱宏昭傳

以宏昭與馮贊代延壽延光按五代會要明宗使相三十八人愍帝使相二十三人宏昭贊皆與焉又會要載長興四年九月敕馮贊有經邦之茂業宜進位子公台但緣平章字犯其父名不欲斥其家諱可改

同平章事爲同中書門下二品此亦有關於官制者
而歐史略不及焉何也

宏昭以樞密使加平章事亦使相也

藥彥稠傳

拜澄州刺史 職方攷不載此州攷唐志嶺南道有澄
州蓋遙授非正任也

蕭希甫傳

幽州李紹宏薦希甫爲魏州推官 按歐史之例凡稱
某州某人者皆節度使也是時幽州節度使周德威
戰歿晉王自領節度以紹宏提舉軍府事宦者傳有
宣徽使馬紹宏嘗賜姓李卽其人也

希甫希旨誣奏革縱囚客殺人而說與鄰人爭井此
事亦見豆盧革傳

桑維翰傳

及維翰爲樞密使復奏置學士 五代會要開運六年
六月勅翰林學士與中書舍人舊分爲兩制各置六
員偶自近年暫停內署況司詔命必在深嚴將使從
宜却仍舊貫宜復置翰林學士院以本紀攷之正維
翰除樞密使之月也

景延廣傳

出帝立延廣有力頗伐其功 按通鑑天福七年七月

加延廣同平章事開運元年四月加兼侍中出爲西京留守傳皆失書

李業傳

高祖皇后之弟也后昆弟七人業最幼 按宋史李洪信傳稱后第六人又稱洪義爲洪信之少弟與此傳異薛史亦稱業昆仲凡六人此七字蓋六之譌
侍衛馬軍都指揮使閻晉卿等 按周本紀稱客省使閻晉卿蓋以客省使領侍衛馬軍也

後贊傳

後贊 通鑑作後匡贊史避宋諱省上一字

王朴傳

顯德三年拜戶部侍郎樞密副使遷樞密使 按周本紀顯德三年九月端明殿學士左散騎常侍王朴爲尚書戶部侍郎樞密副使四年八月王朴爲樞密使傳并爲一年事誤矣朴遷樞密使當書於留守京師之下

鄭仁誨傳

顯德元年拜樞密使 按通鑑是年正月爲樞密使同平章事五月兼侍中傳皆失書

蓋曰忠正 按謚法無正字本當諡忠貞避宋諱追改

耳張承業謚正憲亦當爲貞字

夏魯奇傳

徙鎮武信 按通鑑長興元年四月加魯奇同平章事
傳失書

王思同傳

興元張虔釗攻城西督戰甚急士卒苦之反兵攻虔釗
虔釗走羽林指揮使楊思權呼曰潞王吾主也乃引
軍自西門入降從珂 此事又見楊思權傳

張敬達傳

徙鎮武信晉昌 胡三省云明宗置武信軍於遂州尋

爲孟知祥所陷敬達未嘗往鎮晉得中國始改長安
爲晉昌軍歐史攷之未詳也通鑑書敬達自建雄節
度代敬瑭建雄軍晉州也歐誤以晉昌耳又不知武
信緣何而誤予按舊史末帝紀清泰二年十一月以
徐州節度使張敬達爲晉州節度使舊敬達傳亦云
自彭門移鎮平陽則武信當是武寧之謁武寧徐州
軍額也

翟進宗傳

翟進宗張萬廸者皆不知其何人也 萬廸爲楊光遠
脅降以罪誅歿不在从五人之列傳宜別而出

之讀開端二語似阜白不分矣

史彥超傳

彥超爲漢龍捷都指揮使 按五代會要周廣順元年四月改侍衛馬軍曰龍捷左右軍步軍曰虎捷左右軍御換其名是漢時尙無龍捷之名殆因下文有虎捷字而併追書之耳

孫晟傳

亟召侍衛軍虞候韓通 按韓通名惟此傳及契丹附錄兩見之昔人譏歐陽公不爲通立傳失春秋之旨予攷前史之例如王凌母邱倫諸葛誕之歿魏未亡

也故列於魏志袁粲劉秉之歟宋未亡也故列於宋書若通之歟事乃在宋已受禪之日於例不當入五代史矣五代史七十四篇自世家而外絕不涉宋一字符彥卿李洪信等功名顯於五代而沒在宋初卽不爲立傳史家限斷之法宜爾不得以通一人而紊其例也

鄭遨傳

唐明宗祖廟諱遨 明宗曾祖名敖與遨同音

石昂傳

昂旣去而晉室大亂 此語亦可省

李自倫傳

天福四年 天福上當有晉字

唐六臣傳

初唐天祐三年 三當作二攷唐書本紀摯出西北及裴樞等之見殺皆天祐二年事

守太保致仕趙崇 按唐本紀崇官檢校司空兼太子太保此稱守太保者誤也

明年三月唐哀帝遜位於梁 白馬之禍在天祐二年其四年哀帝遜位梁本紀與唐史所載同獨此傳誤以爲三年事故云明年其實中隔一年也

張文蔚 昭宗遷洛拜中書侍郎同中書門下平章事
據唐史本紀及宰相表文蔚拜相在哀帝時非昭
宗時

張策 河西燉煌人也 按漢魏六朝以郡領縣故稱
人里居者必舉其郡唐宋則以州領縣故例書州而
不書郡此史張策李琪稱河西燉煌人薛貽矩裴廸
稱河東聞喜人皇甫遇稱常山真定人史圭稱常山
石邑人李愚稱渤海無棣人皆舉郡而不舉州此體
例之可議者也若開封大名當時嘗升爲府則例當
書府不書州如氏叔琮張廷蘊之稱開封馬全節劉

詞之稱大名是也

李嗣昭傳

天祐三年 按天祐改元晉王仍稱天復及梁篡位晉始稱天祐四年傳據晉事而言當云天復六年不當稱天祐也

還營而卒 五代會要長興二年四月勅故昭義節度使李嗣昭故幽州節度使周德威故汴州節度使符存審配享莊宗廟歐史惟德威傳載配享事而嗣昭存審篇中則失之

李存進傳

存進振武人也 按呂夢奇撰存進神道碑云字光嗣
樂安人也

太祖攻破朔州得之賜以姓名養爲子從太祖入關破
黃巢以爲義兒軍使 此傳敍歷官本末頗略以存
進碑攷之國昌帥振武時存進已在麾下及從克用
立功爲節度押衙左廂衙隊威雄第一都副兵馬使
奏授銀青光祿大夫檢校太子賓客兼監察御史大
順元年遷殿中侍御史景福二年五月始賜姓名補
充右廂義兒第一院軍使其時距入關破巢幾及十
年攻破朔州又在其前安得卽有賜姓名爲養子之

事乎

歷慈沁二州刺史 以存進碑攷之則太祖時已嘗權
知汾石二州軍州事莊宗時真授石州刺史再知汾
州軍州事又授慈州刺史又權知沁州軍州事蓋未
嘗真授沁州刺史也

以爲天雄軍都部署 通鑑作天雄都巡按使攷異云
莊宗實錄稱軍城使存進傳作都部署莊宗列傳及
薛史存進傳皆云天雄軍都巡按使今從之予攷存
進碑本云天雄軍都部署巡檢使它書作巡按者卽
巡檢之譌或云都部署或云都巡檢各就省文似異

而實同也

存進亦歿於陣 碑云年六十八

子漢韶 碑載存進七子漢韶漢威漢殷漢郁漢筠祿兒歎兒史惟載漢韶一人

伶官傳

皇后劉氏素微其父劉奕賣藥善卜號劉山人 此語又見唐家人傳

四月丁亥朔朝羣臣於中興殿 莊宗歿於洛陽中興殿絳霄殿皆在洛中傳但云東幸汜水而不云還洛亦疎漏也

五代史三

廿二史攷異六十三

錢大昕學

王鎔傳

其先回鶻阿布思之遺種曰沒諾干爲鎮州王武俊騎將武俊錄以爲子遂冒姓王氏沒諾干子曰末坦活未坦活子曰昇昇子曰廷湊按舊唐書王武俊傳武俊初號沒諾干唐書張孝忠傳燕趙間共推張阿勞王沒諾干二人齊名沒諾干王武俊也王廷湊傳曾祖五哥之王武俊養爲子故冒姓王宰相世系表安東王氏五哥之生末坦活末坦活子升朝升朝子

廷湊

舊書廷湊傳載其世系與表正合

狀則沒諾干與王武俊乃是

一人而廷湊之曾祖自名五哥之非沒諾干也五代史誤矣坦恒聲相近升朝或作昇未知誰是

唐中和二年卒子鎔立 通鑑景崇卒在中和三年

羅紹威傳

魏博牙軍亂逐殺其帥樂彥貞 新舊唐史皆作彥禎
此作貞者宋人避仁宗諱改之

立其將趙文建爲留後 舊唐書樂彥禎羅宏信傳皆
作文班

謚曰貞壯 五代會要作貞懿

劉守光傳

匡威爲弟匡儔所逐 唐書作匡籌

李茂貞傳

光啟元年朱玫反僖宗出居興元 唐書僖宗紀在光

啟二年

加拜茂貞尚書令封岐王 此事不著年月據通鑑則

天復元年正月事也今攷舊唐書昭宗紀景福元年
以岐王李茂貞爲興元尹山南西道節度等使是茂
貞之封岐王已久至景福二年十一月制以鳳翔節
度使李茂貞守中書令進封秦王則已由岐而進王

秦矣不應至是始封岐王也

但稱岐王開府置官屬 今鳳翔法門寺有碑題云大
唐秦王重修法門寺塔廟記天祐十九年二月禮部
郎中薛昌序撰文蓋茂貞稱制時所立稱茂貞爲秦
王不云岐王狀則唐亡以後茂貞自稱秦王可證也
岐者一州之名秦者大國之號茂貞在昭宗朝已封
秦王必不舍秦而稱岐且同時吳晉燕趙諸鎮皆取
大國名茂貞何故輒自貶降必不狀矣

以妻爲皇后 當云王后蓋取戰國及漢初諸侯王妻
稱后之例胡三省謂妻之貴踰於其夫者妄也

莊宗已破梁茂貞稱岐王上牋及聞入洛乃上表稱臣
遣其子從曠來朝莊宗以其耆老甚尊禮之改封秦
王 按通鑑同光二年二月進岐王爵爲秦王攷異
云茂貞改封秦王薛史無的確年月實錄同光元年
十一月己酉秦王茂貞遣使賀收復自後皆稱秦王
至二年辛巳制秦王李茂貞可封秦王豈有秦王封
秦王之理必是至是時始自岐王封秦王也予謂茂
貞在唐昭宗時已封秦王實錄所書本不誤溫公以
意改之却非其實何也茂貞唐之舊藩與河東均附
屬籍其上牋莊宗猶以季父行自處儼狀敵國之禮

至是始上表稱臣乃因其舊封授之錫以冊命上云
秦王者茂貞自稱下云秦王者莊宗所命於文義何
嫌歐史之誤與溫公同

茂貞承制拜從曠彰義軍節度使 按通鑑同光二年
加中書令

廢帝入立復以從曠爲鳳翔節度使卒年四十九 按
五代會要從曠在晉高祖朝使相之列據薛史本紀
從曠以開運三年十月卒則晉少帝朝猶是使相也
歐史不書其卒年似卒於唐世矣從曠有子永吉見

蘇逢吉傳

李仁福傳

當唐僖宗時有拓拔思敬者。思敬當作思恭。宋人避
敬字多改爲恭。而同時又有拓拔思敬其人者。乃併
思恭亦誤轉爲敬矣。

開平二年忠諫卒。按舊史世襲傳開平元年授檢校
太尉兼侍中。

其弟彞興。五代會要通鑑皆作彞殷。後避宋朝諱。改
名彞興。

韓遜傳

軍中立其子洙爲留後。梁卽以爲節度使。按舊史本

紀貞明四年加洙同平章事唐同光二年兼侍中
至莊宗時 莊宗上當有唐字

天成四年洙卒卽以洙子澄爲朔方軍留後其將李賓
作亂澄乃上章請帥於朝 按康福傳以澄爲洙之
弟通鑑
同此云洙子似誤彼傳作李從賓此云李賓蓋
史家避後唐諱省一字猶杜重威避晉諱而稱杜威
也通鑑
李匡實又按韓洙於莊宗時加兼侍中至明宗天
成四年乃卒五代會要梁末帝使相三十二人唐莊
宗使相三十二人皆有洙名而明宗使相三十八人
無洙名亦攷之未審也

高萬興傳

是時周密爲彰信軍節度使 彰信當作彰武延州軍額也

以允權爲留後聞漢高祖起太原遂歸漢卽拜節度使

按五代會要允權在漢隱帝周太祖朝皆在使相

之列

薛史乾祐元年加同平章事周廣順元年加兼侍中

廣順三年卒 廣順上富有周字

溫韜傳

茂貞又以美原縣爲鼎州建義勝軍 按義勝軍治耀

州鼎特其屬州耳文義未明白且鼎州之名已見職

方攷此傳可省

以韜爲節度使 茂貞承制加同平章事其後事梁事
唐皆仍其舊官故五代會要入之梁末帝唐莊宗使
相之列

明年流於德州賜死 韜有子延沼見婁繼英傳

雷滿傳

楊行密攻杜洪於郢州荆南成汭出兵救洪汭戰敗溺
水死於君山滿襲破荆南不能守焚掠殆盡而去

按趙匡凝傳成汭死雷彥恭襲取荆南匡凝遣其弟
匡明逐彥恭兩傳同在一卷之中而自相乖舛攷唐

書昭宗紀天復元年武貞軍節度使雷滿卒其子彥威自稱留後其三年荆南節度使成汭及楊行密戰於君山死之武貞軍節度使雷彥威之弟彥恭陷江陵則襲取荆南乃彥恭非滿也

天祐中滿卒子彥恭自立 按唐史滿卒於天復元年子彥威繼之

趙匡凝傳

子匡凝自立是時成汭死雷彥恭襲取荆南 按匡凝自立據通鑑在景福元年壬子而成汭之戰死在天復三年癸亥相距十有二年何得云是時乎

是時梁已破兗鄆遣叔琮康懷英等攻匡凝叔琮取

泌隨二州懷英取鄧州匡凝懼請盟乃止 按唐史

梁破兗鄆在乾寧四年丁巳梁取唐卽泌隨鄧三州

在光化元年戊午皆在天復紀元之前敘事殊爲顛倒若移成汭以下五十八字於請盟乃止之下則首尾有倫矣

朱宣傳

宣乃去事青州節度使王敬武爲軍校敬武以隸其將

曹全晟 按全晟卽全鋐也攷通鑑全鋐於廣明元

年由淄州刺史爲天平節度使而王敬武之得青州

乃在中和二年則全晟不得爲敬武部將而朱宣爲平盧軍校時敬武尚未得節度也

鄆州節度使薛宗卒其將崔君預自稱留後 按唐書本紀乾符四年黃巢陷鄆州天平軍節度使薛崇懿之五年天平軍節度使張裼卒牙將崔君裕自知州事是薛崇之後尚有張裼一人與此傳不合崇與宗裕與預形聲相涉而譌

王師範傳

唐廣明元年無棣人洪霸郎爲盜齊棣間平盧節度使安師儒遣敬武率兵擊破之敬武反兵逐師儒自稱

留後

按唐書王敬武逐安師儒在中和二年

孟方立傳

唐廣明中潞州節度使高鄆攻諸葛爽於河陽遣方立將兵出天井關爲先鋒鄆爲其將劉廣所逐廣爲亂兵所殺方立引兵自天井入據潞州 按唐書方立傳中和元年昭義節度使高鄆擊黃巢戰石橋不勝保華州爲裨將成鄰所殺還據潞州方立率兵攻鄰斬之自稱留後中和元年即廣明二年也彼云成鄰殺鄆而代之與此傳不合舊唐書僖宗紀新唐書王徽傳與此傳同

王珂傳

重榮卒弟重盈立

唐書以重盈爲重榮之兄

馮行襲傳

洋州葛佐辟行襲行軍司馬使以兵鎮谷口通秦蜀道

按唐書行襲傳

附劉巨
容傳

武定節度使楊守忠表爲

行軍司馬使領兵塗谷口以通秦蜀武定者洋州軍號也而節度使名姓各別攷舊唐書宦官傳守忠乃楊復光假子葛佐殆其本姓名也

事梁官至司空

按五代會要行襲在梁太祖朝使相

之列

薛史一本傳官
至兼中書令

氏叔琮傳

太祖遣友寧兵萬人 友寧上當有朱字

孫德昭傳

季述將朝德昭伏甲士道旁邀其輿斬之 據唐書官者傳德昭所斬及所擲之首乃王仲先非劉季述也此傳恐誤

蔣殷傳

是時哀帝方卜郊殷與蔣元暉等有隙因詔之太祖言元暉等教天子卜郊祈天且待諸侯助祭者以謀興復太祖大怒 此事亦見孔循傳

丁會傳

光啟四年東都張全義襲破河陽逐李罕之罕之召晉
兵圍河陽全義告急據梁本紀此事在文德元年
卽光啟四年也且此事已詳見罕之全義兩傳何必
又續述之當云李罕之召晉兵圍張全義於河陽太
祖遣會及葛從周將萬人救之則文簡而當矣

莊宗立以會爲都招討使按五代會要會在莊宗朝
使相之列似同光初會尚無恙薛史天祐七年十一月卒

賀德倫傳

仍爲天雄軍以德倫爲節度使按五代會要德倫在

末帝使相之列

末帝優詔答之言王鎔死鎮人請降遣鄆以兵定鎮州
非有它也 按魏博軍亂在梁貞明元年卽天祐十
二年也王鎔死在天祐十八年與此時初不相涉若
云以給魏軍則鎮魏二州壤地相接聲息易通非可
以此相欺也

閻寶傳

貞明三年賀德倫以魏博降晉 當云貞明元年

張源德傳

亦誤作
三年

康延孝傳

二年遷保義軍節度使 當云同光二年

左廂馬步軍都指揮使董璋 據璋傳爲行營右廂馬
步軍都虞候

朱友謙傳

以其子令德爲遂州節度使 按五代會要莊宗朝使
相有朱令得卽令德也

據薛史本紀令德在同州
節度使任已加平章事矣

袁象先傳

末帝留守東都以大事謀於趙巖巖曰此事如反掌耳
但得招討楊令公一言諭禁軍則事可成 此語已
見楊師厚傳宜去此存彼

末帝卽召龍驤軍在東京者告之曰上以重遇故欲盡召龍驤軍至洛而誅之乃僞爲友珪詔書示之龍驤軍恐懼不知所爲因告之曰友珪弑父與君天下之賊爾能趨洛陽擒之以其首祭先帝則所謂轉禍而爲福也軍士踴躍曰王言是也此事已見末帝紀詞意略同亦宜去此存彼

在宋州十餘年按象先以貞明四年爲平盧節度使其徙鎮宣武未詳何年就使當年移鎮而自貞明四年戊寅至同光元年癸未相距止六歲安得有十餘年之久乎

復獻五萬緡求爲真刺史 宋時防禦團練使刺史皆有遙授正任之分蓋始於此但宋時所謂正任者亦僅食其俸非真履其任也

拜雄州刺史州在雲武之西吐蕃界中 按五代之際雄州有四一爲周世宗所置卽今直隸雄縣一爲南漢所置卽今廣東之南雄府皆見於職方攷一爲南唐所置卽今江南六合縣周平江北遂廢故職方攷不及焉此雄州職方攷亦無之攷唐書地理志雄州在靈州西南百八十里中和元年徙治承天堡者卽此

趙在禮傳

軍士皇甫暉作亂推其將楊仁威爲首仁威不從殺之又推一小校小校不從又殺之乃攜二首詣在禮

此事又見皇甫暉傳

歷鎮秦寧匡國天平忠武武寧歸德晉昌 按舊史唐

明宗長興元年七月以前兗州節度使趙在禮爲左驍衛上將軍九月爲同州節度使四年十月爲襄州節度使末帝清泰元年加同平章事二年爲宋州節度使歐史不書山南東道者漏也在禮於明宗朝自魏州移鎮滄州橫海又移兗州泰寧同州匡國襄州

東山

南末帝時移宋州

歸德

晉高祖時移鄆州

太平

許

忠武少帝時改徐州武寧再除兗州改晉昌軍歟史既脫襄州一鎮其再鎮泰寧亦闕而不書前後移鎮亦失其序不若舊史之核

契丹入汴在禮白宋馳至洛陽按契丹入汴時在禮爲晉昌節度非宋州也

漢高祖立贈中書令按在禮於晉天福三年已加兼侍中史不書生侍中而書贈中書令何也

霍彥威傳

天成三年冬彥威卒於鎮按舊史天成元年加彥威

兼侍中二年加兼中書令

房知溫傳

末帝患魏軍彊難制與趙巖等謀分相魏爲兩鎮魏軍
由此作亂劫德倫叛梁而降晉梁遂失河北此語
亦屢見可省

王建立傳

若文珂守恩皆位兼將相漢大臣也 按舊史文珂時
爲保義節度使同平章事守恩爲西京留守同平章
事故有位兼將相之語歐史不爲文珂立傳非讀舊
史安知文珂之亦使相乎

康福傳

乃拜福涼州刺史河西軍節度使 按韓遜傳以福爲
朔方河西節度使攷唐時靈武與河西各爲一鎮靈
武爲朔方節度使例兼靈州大都督府長史河西節
度治涼州故帶涼州刺史韓氏世鎮靈武唐莊宗時
乃命遙領河西節度福旣代韓澄兼領兩鎮而本傳
不書朔方節度但書河西節度是舍重而舉其輕也
五代史於節度所領之刺史例不書獨此書涼州刺
史於例已不歸一旦又不書靈州長史而書涼州刺
史蓋歐公於官制未甚了了故刪節舊文而未得其

要也

李周傳

晉高祖時復鎮靜難罷還 按五代會要周在唐末帝

晉高祖出帝朝俱在使相之列

舊史本紀清泰三年以西京留守李周爲

汴州節度使同平章事
晉天福三年加兼侍中

劉處讓傳

唐制樞密使常以宦者爲之自梁用敬翔李振至莊宗始用武臣而權重將相 此語已見郭崇韜傳論且敬翔等但爲崇政使不名樞密使也

張希崇傳

遷靈武節度使 代康福

居四歲上書求還內地徙鎮邠寧 按晉家人傳天福二年詔前靈武節度使張從賓發河陽兵蓋希崇徙鎮之後以從賓代之天福初從賓入爲東都巡檢而希崇復鎮靈武也

天福三年月掩畢口大星 按司天攷不載此事惟四年九月癸未月掩畢恐卽此條傳聞之誤

張廷蘿傳

李繼韜叛於潞州莊宗遣明宗爲招討使元行欽爲節部署 按通鑑同光二年安義牙將楊立聚衆

州子城節度副使李繼珂棄城走立自稱留後遣將士表求旌節詔以李嗣源爲招討使李紹榮卽元行欽爲

部署卽此事也立乃繼韜之牙將繼韜先已誅歿而此傳以爲繼韜誤矣明宗紀書同光二年五月破楊立於潞州卽指此事但失書招討使一事耳元行欽傳不云爲潞州行營都部署則史之疏漏也

馬全節傳

徙全節鎮昭義又徙安國

按舊史天福七年六月以

昭義節度使馬全節爲邢州節度使加同平章事開運元年除鄆都留守加兼侍中

開運二年徙鎮順國 按上文已有開運元年則此開

置
字當刪

贈中書令 五代會要謚忠武

皇甫遇傳

以功拜義成軍節度使 按舊史開運二年加遇同平
章事通鑑安審琦稱遇爲皇甫太師蓋嘗加檢校太
師也

安彥威傳

晉高祖入立拜彥威北京留守徙鎮歸德 按彥威留
守北京時已加平章事徙歸德加兼侍中出帝時加

五
秉中書令

劉景嚴傳

義兵亂殺漢章 延州軍亂殺其節度使楊漢章當書
於唐廢帝紀

父徙武勝 按五代會要景嚴在晉出帝朝使相之列
攷舊史本紀却無加使相一節